

四庫全書

集部

欽定四庫全書

圭峯集卷十八

明 羅玘 撰

行狀

故都察院右副都御史謝公行狀

弘治七年夏六月二十三日庚辰都察院右副都御史
長樂謝公卒於家其子鄉貢進士廷柱歷中書事得訃
泣以聞上詔禮部遣祭工部遣官營葬事盖公品正三

階通議大夫實在廷大臣典禮亦宜之公諱士元字仲
仁登景泰甲戌進士官戶部雲南司主事建昌知府歷
廣信永平二府四川右叅政右布政使至今官敍歷凡
三十有七年弘治庚戌年六十七以疾請歸長樂疾良
愈又四年疾復作至是卒年七十公自為童時已蘄然
夙出即知為學嘗在鄉校陳祖妣中書舍人登之女弟
也取名有識鑒過見公在羣兒中目光如炬喜曰吾恃
此孫大謝氏又嘗於僧樓居陳夢大星起樓上寤而覺

公於居以為公占既長通毛詩出入諸經子史為文詞
非古不學場屋之習其餘事也故禮部廷試皆入高等
在部督通州倉首陳四弊大為部諸老所竒而苦於持
正尤勇與閹人敵閹不勝忿欲中傷之幸其去而繫羣
胥使織公罪不可得時崔莊敏公為少宰薦公於太宰
王忠肅公以公才宜典郡遂以知建昌建昌民錯兵居
穿窬夜舊六七發而兵官影庇不可爬搜民大困公至
以它事恐兵官皆股栗自危姦無所伏郭内外十里不

拾遺民日就饒溢乃大新學宮作禮樂器立觀德亭考
射禮於吳諭德夢弼購書萬卷貯講堂江以南學為極
盛新藩臬分司新驛屋及船郵亭如之以賓新城樓及
櫓以戒戎新城隍廟風雲雷雨壇壝社如之以禮神祠
李先生觀墓表黃孝子譚節婦門以風俗皆其請而行
之者也有圖曰敦化曰表忠曰勸學圖繫以詩募流民
間亦以風俗尤戚兄弟之相訟者多詩以諭之惟曾氏
一詩與三圖今盛傳於人政大要於止姦南城民中得

石像潛蒙以腐鼠置屋上鴉羣噪而啄之去來盤旋民
佯驚集其隣升屋下之以為神嫗叟謹趨如市公取其
石碎于庭而止復有巫自魯來妖憑之言禍福如響公
曰是濟人所神為靈哥者今越吾境何能為妖謂巫曰
吾畏謝公吾去巫忽覺如常女子先時民剝于偽平章
之霍宣德中荆國新去之蘄吏治多姑息而無良習器
人骨至公猶欲來飮也懷偽券訟田宅者貫魚來而推
其一人先入券粗見公即叱曰爾何偽乃爾民驚以為

神而僚吏愕不知何以公笑曰吾見其券年踰二紀而券之紙今式也令吏試抱二紀前案驗紙式果然諸伺於門皆逸去比郡一再饑郡民始而警然既而寂然若不知者公豫倡以俸金而富民爭開廩延糴不旬日而新穀升閉廩者十七八貳佐自遠歸載酒飲其邸部使至過引諸已而善必歸之故終其任而胥隸亦不聞有所按逮者屬有疾日一入其寢死殯祭之而為之歸蔡教授死劉訓導繼之二室之嫠垂欲流公歸蔡於漳歸

劉子蜀今漳蜀之人猶稱公仁者成化中大理卿夏公來考察江西列薦者四人公其一焉大約謂公崇尚風教庶幾於古循良而遂有父母妻之封九載郡民詣闕上書請留陞從三品俸仍留郡諸生生祠公於學翰林學士張公為之碑公不可撤祠踣碑比去復立在信年殺於建昌三之二而治聲實相埒屬縣永豐舊治銀閤久弗發而括人寇礦前去後至絡繹恒數千人曳行旅以任負掠民畜以食飲兵官素無肄而括人驍礦莫不

聞皆洶洶自憎時厚公者幸公將代可去以避其鋒公
曰見難而避無勇貽患於人不仁無勇不仁去將焉用
之乃勒兵循靈山東並永平溪踰靈就瀉山下趨之賊聞
公至佯遁而留二三為誘謀不覺以真來白故我兵皆
解嚴至則不壘而休于僧寺且炊餽而我邏卒與誘者
遇易而射之左右白公公驚曰此伏而誘我也急招邏
卒不及公自甲先出而賊伏四起呼聲動林木以筦遮
公環而刺之左股為筦所中血流洞鞞柘陽巡簡者遙

呼警賊曰我公也賊何敢殺天子命吏賊亦愕相視公
猶裹瘡督戰如常所俘殺甚衆得其賊首乘勝破之公
遂臨穴怒曰此禍穴也築之以絕窺睨公還未嘗言戰
時事入朝補永平以憂不赴服除有蜀之命當分司東
川東鄉縣者荆腋陝首猿巢虎穴之鏽皆彎弓帶劍之
民性於寇攘而亡命逋逃是主是來縣凡三劫而有司
依違養寇為已地公曰盜鼠也飼猫於室而骨其足可
乎於是蹤跡其所出入或捕或殺至數百人盜幾盡或

曰縣可徙也公曰盜畏遠乎畏有備乎即遠百里盜有足也奈何不聽檄縣長吏因舊城甃之而浚其隍戍以土兵縣得不徙而迄今亦無變建始夔之僻縣也縣官擁虛名而實掣肘於其頑噤不得以符契從事惴惴尸素以須代不則剽攻於路不立主名以恐其來代者部使置為異域不幸往者餘五十年公偵知之徑按其縣廉得其魁窮治之黨解去比他縣在蜀六年上以全蜀非公不可乃進今官巡撫之時吐蕃大娃小娃生熟二

夷相煽以變邊人告急公曰比其發吾不可包荒兵法
曰致人不致於人不戰而屈人之兵吾用之乃托行邊
繕亭障嚴斥堠選軍實若不知其為變者寇亦幸其未
暴率其醜來獻羊豕羅拜道左曰乃今見天朝大臣吾
生矣公褰帷徐行命譯者揚國威武衆一布一摩之去
公因視邊庾虛實先是邊儲皆諸郡稅畝以充而姦民
關節盤錯名為代輸實白著庾磴然公稽籍以驗數命
官以考實得十三萬石有奇以紓邊饑已酉蜀大饑民

流入會府日如蟻公為廣室於城內十餘區為粥以食之而勤滌其穢以防疫飲病者以藥莖死者以叢塚於東郭外給歸者以符使得傳食以至其處豫檄州縣於其日闕白之行荒政事宜於屬郡而日夜規畫不遑暇食所親活數萬人全蜀以安公為吏善應變神施鬼設不可端倪始視之若越尋丈而揆其終卒無失尺寸遇事不顧利害必達其志雖雷霆在上屹然不動而一言合於道雖武夫賤隸必改容謝之羅一峯張東白二太

史與公交服公改過之勇建昌學成夏方伯記之以處
官事如家事嘉公真確論也然疾惡如仇著於性本故
亦有危公者公未嘗見于言面公至孝居官兩迎父養
事從父如父疾必嘗藥以進三弟終身不割竈自食俸
入弟姪主之嘗一弟女歸裝具差不敵必買諸市弟辭
不許聚食餘千指用數窘公自餒粥于堂以率而族之
不能婚喪孤不能自食貧鬻屋者公力為之所又若沛
然有餘其於親戚亦然嘗率其族之有力者塋其上世

凡上喪建祠堂祀先旦望族以班見買田以祭而儲其
贏以預不虞家居嚴以有禮內外斬然無敢疾趨警效
者非甚疾秉炬諷誦永夜乃休尤好論兵晚亦好易作
玩易軒初號約庵老更曰拙庵曰拙吾實錄也所著有
約庵稿若干卷藏於家詠史近體三百首梓行於時而
或以吏事多公則隘矣公考磐以公貴封中憲大夫建
昌知府妣陳氏封恭人磐考琬琬考鍾鍾考用弼秘德
閔耀濬有本基其先越之上虞人福清在宋曰玉融州

有曰齡壽者來官之遂籍福清國初自福清徙長樂故
長樂之謝祖齡壽而始大於公公娶陳選部良之女實
翊公德子男三長廷桂次廷棐次廷最最縣學生也棐
最之母實曹姓選而側室于公者女八賓壻鄒張容壻
高均完壻李詢官壻黃謀寔壻陳文試寅壻陳廷栢宜
壻高鏐寔在室謀文試鏐亦學生也孫男二本寬本忠
孫女三桂慶幼未名廷桂匍匐歸就哭位哭已如詔葬
公于雞籠山之塋則弘治丙辰歲之十二月二十三日

也舍杖泣來告曰先公幽堂宜有銘墓隧宜有碑國史
宜有傳然而知先公而狀之非子誰也予少侍公學十
年公去郡又復十年先皇帝奄棄萬國自蜀來復與公
會哭於闕下又四年予懼憂家居公得請道郡歸郡之
人空巷迓公至擁公之輿不可行操豚粢索金來餽者
爭隙而入公一無所受而今年春公壽七十郡之仕於
朝者又為文集詩馳以為公壽及今又皆哭公盡哀焉
嗚呼民可劫以術使德已也或惟愚者而智者難或惟

近而遠者難今之德公者朝之士且然獨愚者乎三十年且然死且然獨近乎予不通於古敢問公非仁者與用是撮其槩謹俟立言君子銘之碑之傳之以為世吏勸云

蕭母孺人行狀

孺人姓曾氏諱掌珠泰和長溪人處士彥威之女萬安夏霄蕭莘夫先生之妻監察御史柯之母彥威父興甫興甫父祥卿莘夫父重山處士重山父某皆能以其家

聲振於二縣中而彥威妻魏氏魏亦安成宗家內則世
嫺故孺人生而柔慧夙成姆不能施其規矩教誨之益
長而在閨學女事或時誦古書雖家人不能見其面姆
以其女事示其宗親姪嫗傳觀嘖嘆達于疏屬或以為
式竟亦莫能如也既笄歸莘夫重山素方嚴姑劉氏亦
欲端冢婦於其初備設諸難以為試曾則徐隨應之如
水注地莫不醜布姑大悅賀重山能為宗子得婦重山
亦心幸老遺五穉脫有不諱可無憂羹憂正統丙寅疫

果入室中姑姑劇又中重山亦劇又次第中家衆羣然
呼呶門闕絕無屢跡雞犬飛逸不知其處或曰歸可避
也孺人曰吐吾骨可碎吾足不可移惟與莘夫約吾入
侍汝出掃除焚滌瘞吾出掃除焚滌瘞汝入侍無間疫
勢乃大熾不可為卒皆斃凡南方諺禁疫喪哀哀且及
哀者孺人曰烏有執舅姑之喪而不哀者乎哀如常斂
殯葬雖草具亦麤以禮事既定所存惟重山所遺五穉
暨孺人莘夫七人五穉於孺人叔也門戶狼籍不可支

過者傷心孺人撫五穉叔或泣然而悲又忽而喜謂莘夫曰木摧折甚矣然根存猶可培也假我數年吾見其亭亭乎於是悉發篋實得布焉時五叔之寒溫而製以為衣得繒綺簪珥焉量門閥之宜而委禽以婚得金錢焉資之贄師以學視其學成焉者而又資之以進取嚮呱呱在襁若弗子曰吾所愛何敢視舅姑所愛矧其無所怙恃一蹉跌何以為解拮据徬徨綢繆補苴越數十年迄今一縷一鉤之復實於篋而他之畝割入戶者倍

舊之二戶之口升入縣籍者倍疫餘之十萃夫遂埒封
君至推擇為長掌區稅事五叔亦擁雄名嶄出邑里自
能權子母為居積乃聚謀曰吾拊吾頭顱至吾脛踵吾
居而廬出而騎坐而指使傭奴其吾能邪繫吾兄也盍
以父視之亦吾嫂也盍以母視之茲猶總領日僕僕以
佚吾吾奚以安曷若割而自食幸釋二人重負何如皆
諾孺人不能奪然日猶為之點檢若初不懈人以為兄
父嫂母謠之君子以為確論子三人伯升文仲御史季

升廷皆遣學進士業御史登弘治癸丑高第入翰林為庶吉士立臺三年最典恩封以月日計乃茲四月二十二日得家報白函疑焉剥之丙辰十二月十八日孺人歿此訃也年七十有三御史請奔歸治喪且謀諸伯李告先生率民逸民安民懷民用民表蓋孺人孫也將以某年月日奉塋於縣龍塘某之原瀕行玘比縣人也同遊于西涯先生門又嘗同院往臨弔御史泣謂曰人有言與西涯先生同世而不得一言以為重是自藏也況

幸遊其門而不得一言於其父母是藏父母也自藏可
藏父母不可先生忍藏吾母乎然吾母之行先生不知
也今吾昏瞶不能一二數數一二子亦必能之吾將執
是請幸賜之銘與殯吾身以報吾母有間矣玆哀之不
能辭也謹狀

張母太孺人行狀

皇贈給事中張府君妻李氏諱兆明弘治十年春以其
子刑科給事中文貴封太孺人制下給事於邸馳僕歸

刻期數至日而孺人以二月五日歿其家亦刻日數計至至之日給事袒括叫號弔者至及向之鄉之弔者泣語之玆往弔泣不已出一函拜且祈曰文必得子狀吾母以干宗工銘發函孺人父律鑑大父祖訓曾大父彥章皆邑傑魁名人而彥章父曰杏隱洪武中以其詩鳴母曰施氏又曰彭氏生母也二母侍律鑑終身惟鞠孺人叢愛稠息過甚膚體長養涵濡志全璠璣而孺人純懿警敏亦自天至達知古書操筆大小書矩正規完如

法度士陋凡下里市鬻布縷不為為必輕盈淨潔綢翼
波紋鉢人目皆媒有入李氏輒見律鑑意色皆緘口歸
府君幼實倜儻好學有令名邑里莫不聞一媒試言之
律鑑喜曰吾壻也許之張故大家也孺人歸事方絲枲
緒錯莫之適理府君日支門戶多外出罕內顧孺人裳
不及闕言如之而日自就緒婢之慧者治麻枲羞酒食
驚者豢牢豕豎牧羊犢者兼薪蒸備竈爨藝蔬灌菓蔬
者刈芻飼魚墾田藝稼者無雜傭張唇利口以徭公家

各惟其罷府君惟視成至數十年私用公輸貧賙喪賻
子婚親宴廟祀日若汲井而出源源不知其自府君曰
吾有庫藏吾有廩廩其如予何謂孺人也初諸事事者
日入見府君皆猥縮偃僂或至顛躓雖子姓亦然或有
愆度即小不貫閭左跼踖無寧自便孺人口不言而意
極慘怛至對案不食府君覺之為霽其嚴然終用是賈
禍嘗疾尹饗齏其縣訟言聲於衆或以告尹尹怒設百
牢意必殺覆其家乃憚會盜起縣界府君結族援以備

也仇家揣尹意誣以不軌嘗尹尹喜舞煖之上于臺臺
考無所得得釋出出即患病死客舍孺人以舟迎喪歸
藁葬町疇鬚髮誓必報又齧兒臂出血救不報不葬給
事明春秋三氏亦以賊不討不書葬復孺人孺人曰吾
志也仇時方殺人子弱不能讐以賄免孺人佐以健
僕資遣之訟于京事下御史逮繫之置於法適給事亦
得省焉孺人大喜大會賓客啓府君葬于隴至今過其
門者皆拱手曰烈婦烈婦云乙卯給事持節南方得便

省拜堂下孺人顧見命服忽掩面悲曰此女父之遺女也其靈承母忝竟無幾微矜詫意婦以闕下事語則更朗言了了若嘗至其地而目擊之者其博見多聞近亦稀有春秋六十有一子給事而下輅輜輶凡四人給事登癸丑進士至今官輕側室張氏出孺人亦如已出孫某某給事歸筮以下某年月日葬於某之原嗚呼不以家憂其夫而以已之所愛愛夫之所遺者能也德也亦難能也而世或有之至於夫死于仇死已矣知有仇者

寡矣或知之以遺其子者益寡矣而況立於其身復焉
世復幾人哉玘誠不忍當時宗工不及於此也謹狀其
槩且大者以告

劉母太孺人王氏行狀

孺人南京翰林院孔目封監察御史劉君之妻鄉貢士
壬翰林庶吉士監察御史丙之母姓王氏諱某父諱某
祖諱某王於劉為甲乙族翰林之父南雄府君初與某
同為庠舍生有契義自託昏故孺人竟歸翰林翰林家

嗣南雄南雄自翰林庶吉士通判金華廉名為天下第一雖仕十餘年囊無錙銖不免凍饑遭母喪不能塋有欲來賻者億其不取而止以故一累於翰林翰林無所取貲惟授徒寸累以襄事孺人始出於素佚亦即能躬爨浙宵治麻縷葛越以佐費食貧甘甚如嘗習然南雄一意砥礪名節無少內顧三女嫁具無所出衿輦佩帨簪珥之屬皆孺人傾篋與之且終不以洩于壻家南雄所至宦邸徒四壁家屬悉歸集待哺翰林苦不能支又

悉屏珍玩鬻金市米以給更十年翰林始以尚書舉于鄉教武昌進教武進官極散漫終與貧不能脫去賴孺人亦相忘節縮哀補以賓且祭子贅師女贅其舅姑必豐必潔又如世富溢者南雄竟以直道得禍英宗朝以樞歸獨事李宜人十年李年八十孺人亦年六十朝夕寢膳尚如始入劉氏時雖處久窶門內外未嘗見其有顰呻弗寧態人有乞假亦無有徒手而反者宗親喪塋非疾病雖暑雨泥淖不輟弔哭終其身華靡珍麗之物

一無所御安成人至今無不服其為劉氏婦壬業學丙
亦業學喜曰而祖而父踵胼此而食且六十年不可棄
去壬丙同舉丙午明年丁未丙第進士改庶吉士入臺
為御史按雲南道歸省又喜曰而祖詒而以直清令名
海內莫不聞而父紹緒亦既孔艱而克念哉毋徒以溫
飽吾二人為戚戚丙茲反命闕下適初考推恩得今封
而凶問又即至丙方陞辭出督馬政駐於都門外也饗
年七十有七卒之日是為弘治七年七月三十日適蕭

循讓適彭宜塤適易正時凡三人其女也珙瓊琮玗

缺

凡五人其孫也丙請歸喪且以某年月日塋於某之
原而掩幽之石宜文以命世之豪必先以予為之狀者
予丙之同年也同為庶吉士者也非優為之也嘗聞之
丙也謹狀

贈宜人王母劉氏行狀

宜人姓劉氏諱某字月珠安福上城人隱君子仕泰之
女贈長史某之妻榮府長史選之母也其歿也以成化

壬寅三月之三日屬弘治甲寅以長史前官翰林檢討之貴贈孺人及傅王功成進官故又進今贈誥旨煌煌實燭泉壤凡再遭也長史在王左右弗獲捧以拜焚於墓下戰慄慄拜稽首言曰休哉臣母若復生其耿耿之光間嘗泣語予曰吾母年止六十有九而已而在吾氏五十有三年相吾先君養吾祖母也如其母而吾祖母稱諸人亦曰是吾女也平居溫溫不見其有愠容妯娌悅之曰是吾同生也逮下不見其有厲色與叱咤聲妾

暨婢僕曰吾父母也戚屬之多不能無向盛者亦不能無向衰者未嘗曰此姻也仰隆之此婭也俯薄之兄弟時而漸替于初則曰吾知卹其衰對吾先君也或以規或以諷終身不見裏言若嚴賓焉又曰吾選也慎典也慎恩也逢真也淑貞也吾母之子若女也慎獨也慎德也慎終也側室蕭氏之子也吾母合而字育之不欲以嫡庶辯皆擇仕族婚之與其所歸選娶於劉為冢婦諭德其從兄有大名次彭次劉監察御史其從姪僉事其

兄次李給事中其叔父次曠為衆婦壻封主事劉來徵
逢真夫義官賀孚晉淑貞夫某部郎中某逢真之子是
為甥也又曰石橋縣之嘉地也吾母墓在焉茲二十餘
年木且拱矣乃始克承休光儀式以次俱陞職在有司
謹奉如制於乎成矣然不及其生逢之吾終天之悲也
人或曰必得吾子言後世知有吾母庶幾塞吾之悲吾
子其何如予不能拒也謹狀如右然亦具其言云

圭峯集卷十八

欽定四庫全書

集部

圭峯集卷

十九

詳校官監察御史

臣曹坦

中書

臣

劉源溥覆勘

總校官庶吉士臣何思鈞

校對官中書臣王 瓚

謄錄監生臣陳 煜

欽定四庫全書

圭峯集卷十九

明 羅玘 撰

墓表

監察御史彭君墓表

弘治十四年冬十一月十有八日江西提舉副使邵君
屬饒守李君貳守鮑君介何生徐生走南城抵予室命
表故監察御史彭君之墓且曰君里世他行葬所歲日

月有編修程正之誌銘在惟君貞臣臣行首貞願表于其墓告來者為饒士世世勸予既泣泣已思邵君為戶部時常別白時之忠佞若涇渭然至君則曰此所謂渭也至其指為涇者則又若仇敵不少貸今茲果然既又思君平時言笑嘻嘻劇飲歌呼遇人無爾汝見其肺肝無留畛或坦坦夷夷人或易之子獨曰是非其性要有蘊藉耳成化末同舉進士日益追逐相唯諾見時有附閹貴驟至要樞者有苞苴徑內降補官者謂曰是不可

鉗之于市耶至雜他同年則竟日寂無所指斥者予於是益覘君弘治改元之明年擢河南道監察御史巡京城之内外暨近畿橫亘數百里降人營也歲朔風塵起馳騎彎弓掠人道上事洩索急則扳戚里閹奴為援匿優伶家為恒君每得其機牙發之奇中人驚為神始改觀悚息用薦出巡漕之鹽法予時奔先君之喪過之漕之人曰是御史公商竈其兩德之又曰是御史不可干以私六貴人助富人奪人妻弗能得予喜曰是將蘄然

矣予免喪至闕則弘治六年也禱祠事興上非其好也
乃閹之黠誦入之自擅睂目標榜鼓其幻徒日食于大
官不嫌又假供養莊嚴糜耗百貨延于大農之錢方酣
君時監光祿寺事奮曰吾不能嘿嘿以苟活刻時日至
于大官雖重得禍萬無恨明日疏入謂宜一切罷革儲
積之以待變仙釋幻惑其道左且生根語觸諱忌群閹
銜而持之遂下君錦衣獄舉朝震駭莫不服君之忠而
危其禍英國張公獨首白辯君無罪宜貫諸大臣助之

上意乃解然猶編管邊之隆慶衛伍在伍惟以母老羈
京邸為憂明年詔釋歸養其母吏部尚書王公建議起
君行召君矣而母李孺人歿未及葬君亦歿逾年一子
希龍又歿天下莫不悲其禍之烈既又莫不惜其不及
召且大用以沛其施且惟希龍遺腹子天錫是嗣方三
齡也於乎天難諶斯人事之入于無窮其不可知其穹
碑大隧之加於斯有也抑榛莽之蔽狐狸之窟而或夷
而為墟蹊坎竇亦有也甚而陵谷之迭與為變亦有也况

於茲墓乎則夫貞臣者固世倚以為重而亦其身之有不必茫歟然君之字書與夫歌詩雜著天下莫不存君之名內自六宮外暨蠻夷海裔莫不聞史氏當不有遺也而邵君又率其屬為君世世之托君其可以無憾而安于此惟予弗任厥職亦惟曰祇服邵君之役

夫人李氏墓表

夫人故都察院右都御史馬公配也姓李氏諱某字某與公均汀之長汀人曾祖某祖某父某母某氏皆生夫

人與所自生者也男緒入粟為郎綜醫學正科緝府學
生維以蔭授上林苑監蕃育署丞孫男文明文英文欽
文昭曾孫男京城師女大妹適國子生周韶鳳孫女劉
姐適鄧翊細女適鄧儒三姐適徐明六姐適廖本皆府
學生周妹未聘曾孫女七九長皆夫人生與所生生者也
初夫人生母坐蓐見肉胞如毬狀甚訝之以為是必物
怪之為者急溺之浴槃中須其絕姨救免須臾又溺如
初隣之二三嫗走視之驚曰是肉毬也諺識有之凡毬

生者無男女必貴必封之出以浴母不得溺付婢浴之
永樂壬寅二月十六其日也稍長凝秀端慧壺闥閩外
跬跡弗及臧獲隣並至不識其聲況見其面及所攸為
他日嫗有入李氏攜其翦製組刺輕盈綽約出見諸戚
諸戚爭傳以為式或又醜其陋則憤懣不欲見見即咨
嗟以為不能為久之前所述識二三嫗喜相慶曰識其
驗乎吾其不妄語已矣既筭歸公正統甲子公以禮經
魁福建乙丑登進士入主戶部事以夫人來主內事公

得悉意于公入如客主夫人曰是不可獨吾力諸廼益
一側室顧氏為助力益衆賓至公得叩檻呼漿茗咄嗟
膳羞移日賓退宵寐安安夙興入闕旦晝坐署處分暝
歸咏詩歌于于施施以為常公擢郎中遷四川叅政遷
右布政使尋轉左布政使擢都察院右副都御史巡撫
湖湘夫人皆相如初以行及公翻然思老得詔加右都
御史夫人得令封以歸則又贊公曰必如是必如是公
營壽藏于城東八里之樂丘時與夫人籃輿徜徉其上

顧曰樂哉是丘百歲後吾與若同歸于此夫人曰幸甚
敢不惟命弘治丙辰五月某日公卒葬焉後七年壬戌
五月二十七日夫人亦卒春秋八十一某月日緒綜緝
啓以祔一如公命越明年癸亥正月二十日計始至署
維慟絕曰吾顧出也吾幼不知誰出也緒也綜也緝也
吾母於吾固同溫且飽也無擇也婚均吾甲乙氏之族
也奪緒廢以廢吾也吾不得視吾母之歛且殯且葬也
於乎吾罪也既已又屬鍾選部曰若吾戚也若其謀所

以揭吾母之章章也選部乃入吾室且述曰維之言然予校南宮選部予所得士為知己其豈我欺於乎患天不降祥祥不患虛患人無施施不患人之不知觀夫人又觀維二事吾益信之因為次之俾鏡以表諸墓噫

止庵詹先生墓表

予少側聞正統之季雲南孟養用兵有上言其將帥失律張皇病民者天子大嘉異之詔即用往參其軍事事雖中止然一時名震海內將卒懾懼用命克底成功為

時一助蓋校官也而失其名及官于朝聞諸長老言知為詹君名英字秀實也最後乃得其孫大理左寺副習言之則君也歿於甲辰六月某日今二十年矣其言事時方訓導于蜀之會川會川與雲南接而君之僑寓在貴貴兵入道也害之切于肌膚而事之熟于備嘗然孰敢出身當之而君獨言之實奇士先是疏言邊務十三事皆已見諸施行而在職以俾夷為華為已任會川夷陬也有貢與科實自君之教始人用是信之知其非一

旦偶然發者其始聞詔也恐事掣肘非便自詣闕以不
可狀辭公卿聞其至皆欲識其面或納交或招致為重
客或欲薦以臺職處之會己巳之變止歸會川滿考轉
雲南河西教諭雖去蜀猶憂其患疏薦可撫蜀者侍郎
張固上可之蜀賴以安其憂世不少置多此類初貴之
學以宣慰司置戎衛限不與君時尚少以書抵都府擬
請如司例行之著為令君首事發解于雲南士疏踵起
起必曰是由詹氏詹故玉山仕族也宋多聞人洪武中

始以定襄知縣坐累謫戍于貴遂為貴人於君為王父
諱珍寶定襄生處士諱源是實生君君生三歲處士識
其非常兒取目前器物人倫字類引聲指訓漸及于遠
引物連類旁推曲貫約久截中汎抽試之百不失一因
驚喜知詹之將必復振比少長從童子師游輒難以駢
句無不落聲而應或若天成古文奇字惟其目所流注
矢口縱衡莫不如志貴寄蠻壤為藩庶事草草奇童崛
出咸訝瑞降以為興端時同舍生號王三遍者三遍者讀

三過之云也後以君偶之曰一覽一覽云者尤殺其數之二也若曰過之之云也積數歲學益進發為文章氣益盎熏人宣慰宋侯伯仲方擅文場壁立堅甚獨開一面納君王後終教授雅有盛名終身不昌言為敵君葬城西原王為誌墓焉君年止七十二距解官幾二十年始娶于楊繼于段封大理評事木義官米其二子大理左寺副恩程番學生惠其二孫適學生陸隣適鄉貢士張宇其女與孫女雲表雲章其曾孫也大理又與子言君

純孝天至至老歲時忌奠悲啼如少時散所藏以家室
族之人與其鄉人往往折負償之券嬉笑臨之擅丘壑
之趣於壺觴歌咏間有止庵先生藁行于時此則君之
高也苟不役於物者或能之至其大節憲憲在人耳目
則有不在是者於乎已已之先變未覺也而四方亦既
騷動日入于多事矣而疎遠之小臣有能奮不顧身言
天下事如君者而天子又能聽之不徒聽之而又用之
當時大臣不徒不嫉之而又欲薦之是可謂不諱之朝

而言猶不墜于上聞也故雖遭是莫大之變而卒亦莫之能災者豈無自哉大理丐表君之墓予於次第之末因併載是以志敵國外患法家拂士之有益人國者信夫正所以旌君也

吳母駱氏孺人墓表

蒼梧吳孺人進士順德令廷舉之母處士英之妻駱志榮之女也歿且葬今七年矣廷舉始克以狀乞予表其墓始予遇廷舉于太學秀而脩臞啖肉不盡載葷辛之

味少所御尤不樂戲弄百玩本其自曰吾母教然今既往矣與之語穿貫經史若炙輠然曰廷舉少失怙恃吾母以生遣學學宮宵則執燭治女事因督誦讀五鼓復然如是者庚子得鄉薦乃止茲不酬母志大罪也間嘗泣予曰先君蚤世時吾母幾欲絕以廷舉故少能支然猶三年睚眦不時嘆闔扉屏接見衣絺苧蓬弗櫛垢弗沐也丙申歲廷舉邁暴疾奄奄神魄殄殢無幾羣叔欲具棖止吾母禱藥費卒不得營益急枵腹自朔旦達旦

晝夜不少瞬諸母更番迭休弗能支嘆曰神也廷舉賴以活不肖軀至茲成人嘗指隣貴歐轉運第扁恩榮字曰渠何為者而何為者即不逐晷自策勵流而日月當與鄉人徂矣而母尚何歸耶時家已索莫歲連大稔仰哺如堵而其師賓問遺率如常不以戚羣叔澣滌紉綴除敝更完字不肖軀者不後他學子惟少懈防護至綻污闢跂必褻而責之然亦未嘗顯撻也於人介取而多予他學子有以書遺廷舉者輒怒還其家不留宿尤不喜

紛華熠燿嫁來之衣三十年尚襜如也花晨燈夕梧土
雜遝游觀以為俗惟吾母酷惡之及今亦有化之者而
此其凡也不知古列女何如耳而壽止五十天竟何為
哉嗚呼廷舉所以悲而重為知己告焉明年丁未廷舉
與吾同登進士第又明年戊申出令南海上由洞庭上
郴嶺歸拜墓下欲買石刻其事而狀來予憶其前言與
茲狀合也聞於粵人詎一二且習也予無以拒之矣抑
予肄史館者也假而筆予屬也續更生之序敢讓乎雖

然有子矣不但已也墓隧之碑庸詎知無掀揭天地者
為之乎書而歸之使刻石以俟

浮梁黃處士墓表

黃德恒諱秉彝浮梁處士也家縣之景德鎮鎮之人以
萬室陶天下自景德之陶盛而諸陶廢天下民用日仰
于景德挾其有與技來集至天子亦出中官監製上供
甲品設行監其地以故互市日繁貨泉流渚而四方謳
歛戲弄百具染及昨隸為楚越交巨鎮然其利之擅皆

土其鄉之豪也黃氏世不酣據之處士生首遲之行第
屬統宗衆方以讀書用世為的尤以意示宗衆無逐隣
為射利賈多怨或為市習所染時因事陰割已蓄以歸
宗之貧且厄者為率而口不顯及楚之俗瞰貴富者之
墓夜坎之內父母骸其中思齊焉曰侵地中之者立蒙
禍敗祖一常遭之羣洶洶擬發驗處士付禍于天不動
踰年生事倍豐羣洶洶者媿嘿息務匿人垢癥而婉導
曲成之不引任為已德一弟秉忠終身賓之不忍分割

而苦俗風簸煽輒蹙額弗寧竟堅鎮之延及白首以
勢不可而自竈取析券內匱中緘之棲梁木上泣
且數日最晚以齒舉賓鄉飲孝宗初恩預冠服歲時
縣舉飲入縣飲飲已明日入謝謝已屏出跡每出鎮人
以為祥門之左故有橋上度馬或墜宣德中割地以為
衢而橋亦廣之稱是鄉人至今德之名之曰步雲橋志
黃氏之興也子琳孫嵩峰巘城孫女三魯孫男六弘治
甲寅十二月四日年八十九卒葬里之唐塢其祔則孺

人朱氏也始將葬嵩時以鄉貢士試京師乞銘予以館事辭子得告歸使日月至乞不置比復館嵩已宰臨湘乞如予在告者正德丙寅秋自臨湘來上考功第請曰祖墓築堅久弗忍內銘矣謹醵石焉俟樹表也予尚難之乃涕泣言曰嵩微祖無以有今日遂盛言其游心振後暑不求風寒不求燠玉嵩與岷期于有成嵩塞不通於遠近吾百里則無之貴弗掩是焉爾子曰世有奸雄資利近便田宅自殖焉者忍自其兄弟親戚乎侵之曰

以遺吾子若孫其子若孫有能卒享其遺者乎嵩之言
然處士不為衆之所遺其遺也乃若是其諸異乎人之
遺之與因次嵩狀為表畀之歸饒諸礮之石

姜孺人汪氏墓表

成化辛卯某月某日姜孺人汪氏卒葬里蓮華石之原
至于今正德丁卯凡三十七年自辛卯距正統丁巳始
女子姜氏壁在姜氏凡三十有五年生紳綬綰男三女
八渠鳳清溥汎浙泓孫七孫女二自丁巳距永樂己亥

是其生比卒得年者五十三汪英濟王裔也王始迹于歙故王裔多布居歙婺弋陽之間遠有代序而自西里之汪獨盛于弋陽國初迄今稱長者曰庭實曰朝章曰韞璠凡三世蓋孺人曾祖祖父也母縣馬鞍山徐氏故大家在湖以東俗好炊熬菹醢脯醢鏟根實為百物狀出飲賓為名高而閨妹類日繡組鞶纓誨諸嫺族若釣來聘者孺人幼已知薄之姆如母言日引同事外雖不違而心竟惡以巧作鑿其真曰不有內則者在習乎

益肅於步履而嚴於笑顰姜學訓同里與汪絜大者恐失之以媒入韞璠遂許璧既歸姑馬氏喜得婦以內事付之乃與學訓出教德平多其歲時如在顏面或遇代過家周視堂廟壺與鼎簋幕帟翼翼垂垂大綜于庭僕趨於下斬若官署見其隣媪親英與講貧下嫗叟具賀曰賢婦賢婦雖其父母口不宣言然亦辛姜之內政自其家施之而自慶汪之有孝女暨逮終之哀比諸兄弟其骨肉之愛終其身如初璧以疾卒綰方六歲有奇氣出

諸兒心存之而不弄以他物興居食飲意向以矩度自
念曰吾以是兒昌此室逮疾革猶在念綰時未室出金
盞曰以婚爾綰悲率由無怠至起進士官南臺御史發
寺人宗姦蹶而復起守荒城計摧女猛奄至之鋒如掃
敗葉事聞朝野股栗其究也坐籌苓苗卒定兩江時方
屬當一面以起天下之懦而遽以河南按察使死天下
識與不識為世悲之曰玉卿玉卿玉卿云者其字也始
玉卿病豫處分立諸子曰爾哀吾之死耶未若哀爾祖

妣之不傳也我死母以羅太史銘若爾吾哀移以表爾
祖妣之墓吾瞑目矣至是請果走汎來如其處分語於
乎死不忘親吾其何辭遂次所授劉絢狀付歸鑱之墓
庶幾覽者知有是子必先有是母也清鄉進士暨汎以
下裒然孺人之澤方瀼瀼云

圭峯集卷十九

欽定四庫全書

圭峰集卷二十

明 羅玘 撰

祭文

祭丘文莊公文

不肖玘慕公於草野間幾二十年及識公年已四十矣
公在太學時而不肖又以例進凡例進之士既以庸濁
混淆清流人所鄙棄雖有卓然自拔亦時無以自明况

公宏博雄大之聲又先有以蓋吞一時而凡私相標榜盜名者皆屏息歛藏惴惴然恐露頭角如素負其妍而寔未自決者惟恐鑑之縣于前也况遐外寡昧兼以荒落困憊之餘如不肖者尚何敢影響於公乎不意公之包荒納汙遂以盈尺之紙瑣屑之辭援不肖汙溝之中濯以清波襲以芳馨而又風而飄之不肖至今靜思之不知何以得此於公也不肖之心自以為父母生之有此身也若微公也則將委棄沉淪於昧昧中與無是身等

耳而父母亦何賴焉用是思欲效絲毫之報於公前年
丁先人憂家居私作一書首以公歸為勸情頗激烈及
來拜公公首肯前語不肖感公之不疑也凡懇章一再
上皆從更不敢依違同於衆人然天子方確然留公公
之去志雖久決矣卒亦無如之何而至於此公之文章
不肖將與蔣冕成之而刻以行又將出管窺之見揀以
為私抄以成公志公之喪天子使臣護焉可歸也若公
之名在後世當必有聞而興起者不肖何足以知之因

拜奠之頃涕泣不知所云公尚鑒哉

祭仲松東先生文

於乎凡人仕不得於君祿不逮養其親教其子而不能
以成身罷則無所於歸而食貧是皆有憾乎於其為人
若乃紆金垂紳入兮以寅出兮以昏高振國手保聖躬
于天閭有母在閤食大官之膳而白頭出則以魚軒當
龍飛之首有仲以吹簫矣而伯又繼以吹壎逮夫明農
歲入飽及比鄰噫吾未見其人也於先生獨云然人寄

以生母恃以終子仰其教隣忘其窮今先生忽如是也
嗟誰之不逢耶我二三子弔于祠部之邸祠部於先生
子也於我友也重以文莫焉伏惟尚饗

祭故吳母沈孺人丈

於乎靈之為兒比及勝筭既筭來歸所不及知及夫子
有聲奮翼南畿以其鄉書唾手禮闈與天下士大廷齊
驅何物中秘汪洋而能遍窺古稱三長為作史者之樞
需然有餘者誰歟夫子也人亦有言若暱以宴私牝鳴

于時雖有剛腸孰能與於斯噫是非女德之良者乎副
笄六珈偕老是宜南院之行留養舅姑何遽奪之俾夫
子之不獲訣於其廬天乎抑人乎南天遙遙安能止夫
子之悲聊寄奠焉且將以辭尚饗

祭封少詹事翰林侍讀學士王公文

人有恬退之心以立乎其位難能也而怵之以利害掣
之以朋疑雖畢竟於遂也然或無以快其超然之高此
繫其志之勇與不勇有豪傑之才生于其家難遇也而拘

之以世類狃之以習尚雖畢竟於成也然或無以完其天然之全此繫其父兄之賢與不賢若公之仕也齟齬不合超然而歸無復顧忌而且優游於山之巔水之涯者尚數十年非勇者乎育今少宰先生蚤為聞人晚成醇儒以道德文章重天下時且繫以升降也不賢而能如是乎是可見公之勇也足為世之仕者之的而其賢也有陰翊世道之功踰耄望耄之壽賓詹學士之封生固熒然歿與生同况夫帝有恩言葬公祭公於乎盛矣

玘等十五人者先生之門人也飲泉菟木不知所自
耶既曰知矣而不能執紼以送公也徒成浩歎而已而
又可遂已耶聊因先生之奔喪也陳詞而附奠焉先生
鑒哉尚饗

祭李徵伯文

於乎徵伯吾深望子謂子崛竒駕以勇駛不類見驚甘
受勒轡納之劇達一日千里我日衰頽有子足恃恃而翁
談動輒以此翁笑不言其亦有以我告南歸心疾於矢

微子經營殆或中止騎而顧我我覩子齒少不宜然而有
拆理譬彼美錦閔以紕類我欲玉之使試婦揣我歸三
年如坐井底影響昧昧懲彼搖尾意子如鵬已同風起
忽若有聞恍在夢寐云子何如恐或妄耳子不可無子
不可死且信且疑當食失匕凡今之人有父在仕作其
威聲黃熊蒼兕矧參鈞衡其又肯已噶噶昏昏逆天干
紀維子惜惜類寒峻士敬不妄譽慢不妄毀人人則然
邦其與矣我其北來哭子凡幾喪明者誰白頭孔偯大

合群阡子亦在啓從先人居是謂受祉子有遺文寧必
皆是我選我別期壽於梓維子勿怖爾叔爾弟曾祖祖
母子聽藝使茶陵李氏母伍庸鬼有酒在觴有帛在筐
子飲子聽有如易水尚饗

祭費叅議文

嗚呼公也能以猶子魁天下可謂之善教而豫處其然
又可謂之有識翻然乞身未及其年可謂之善遊而卒
能使生不竟於蠻方又可謂幾於知幾之神生能使呂

梁之民戴之如父母可謂之仁而沒能使人廟而食之於無窮也又可謂之入人也深嗚呼吾不暇論其它也是以過而祭公公其享之哉

祭費安人余氏文

鞠子非艱教子之維艱教子非艱成子之維艱子也在國蔚為士元匪徒士元氣盈區寰其在於古奚有馬班吾得而友砭愚訂頑非母誰使之陰德母賢陰祈其年而遽大還士林淒然吾悲孔酸登堂奠焉文以代言尚

鄉食

祭丘丈莊公文

代英
國作

瓊距中原海天萬里誰知有瓊知自公始公學如海其
宏其深孰測其底孰探其琛公識如鑑聽物之來豈惟
鼠豹龍肉鶴胎孰為公文布帛菽粟孰為公心虛堂空谷
公始來時章逢一儒今四十年天子三孤公始來時我
失先王我方知兵與公相忘晚同史事日益親公知公
為人自始至終公之大用維天子知既已老矣懇懇以

辭辭而不獲遂益其疾乃于邸第奄以易簣弱兒孤孫
偕公以歸我奠以文而寧不悲尚饗

祭英國太夫人文

代陸仲英作

延陵有支大鹵之鄙其凝其鍾大宗有子有赫英邦天
作之合天王女妃連以玉牒王亦孔武當天步艱首死
敵庭姦權厚顏國有忠臣家有烈婦立孤嗣爵兵符肘
後子壻孫甥三公群伯祈父衛率咸侍巾幘踰耄望耄
屢朝四宮后有殊錫帝有崇封寔倦含飴聿思先王違

榮神遊維帝悼傷命中貴來且賻且弔宗伯司祀司空
卜兆慘慘太師執喪哀毀予末小子僭施葛藟比我惠
我及我實多不腆致奠其悲奈何尚饗

祭曾祖司稅公文

洪武初歿于蘭谿
任所過而祭之

夫神當天造草昧羣雄逐鹿之秋綽能布昭才猷克全
宗祧于殺人如刈菅蒯之隙用以待天下之清大公小
侯囊中物耳矧及真主正大位又能深自晦藏屢孤召
辟瀕九死不得已乃甘隱下僚竟終于位蓋蘭谿其地

而司稅其職也時神之子曾孫之祖以三尺之孤克還
以祔先塋百年于茲玆方竊有祿位實神之遺將大有
所發此其始也玆前過茲地尚有衰服不敢以祭茲當
北上特假道焉敢就易簣之所陳獻特牲暴白前志惟
神孤遠之魂洋洋如在以慰曾孫之思尚饗

祭吳太安人丈

於乎宜人生也有夫之封有子之養有孫之賢有八十
四齡之壽亦既多祉矣然而不必他州常之四封容有

之義興將來未可必也至於老而病也病而劇也有孫泣請于朝以歸省及既歿也遂得以視其殯且葬焉則不獸義興它州或所無也是所謂其生也榮其死也哀其哀也人莫不知之雖吾君亦知之於乎可謂盛矣玃等於其孫之泣請時甚義其行況同年也同官也且同志也敢因以附奠焉尚饗

祭都給事中屈引之文

夫觀世之人多美則裸雖否亦裸多智則舞雖否亦舞

處顯類驕孰顯弗驕遇進類競孰進弗競所以鮮令終也引之果有是乎貧能安之而不求其心退然羸能攝之而不斲其情泊然所以多壽考也引之果無是乎然則令終而壽也其引之乎而今也至於斯何也抑壽也者不死之令名也而古所謂不死者有三焉立德立功立言是已於乎引之有立德之基而施未究有立功之漸而位未究有立言之蘊而畜不以發則世之所謂不死者又殊未可知也吾黨知之深者能不為之悲哉痛於

執紼之餘訣之具有知乎哉寧不亮吾黨之悲也哉酒
殽在陳尚饗

祭胡封君文

嗚呼朔方兵衝也人挾弓矢廼業詩書人恃疏敘廼與
義俱歸人之女存人之孤葬人之死活人之軀已用以
奮而輒蹈其翼人資其用而若摧乎枯以若而人如死
可贖世百其夫而曾未及下壽溘然長徂雖然享令子
之貴而列御郎署其在邊關是為優乎然某有聞其聲

匪造其廬况能執紼而輓其輶車惟寄奠而再三兮悲
鳴尚饗

祭謝約菴先生文

政莫如猛鄭僑有言公始臨我利斧在前孰為鬼蜮以
邇我公而不糜爛不賁爾儂亦有大青不製於法苟全
其人苟累不懾人亦有嚚觀公於初如以槁葉投之紅
鑪及政之成學有新廟公亦勞止以教以詔山行水宿
何有害災有乞水火里門夜開公既去矣今三十年穀

破鷄出拚飛戾天縛殺長吏覆城亦多今之為吏束手
奈何民惟公思公亦可作公在九原公面如昨矧有令
子奔公之喪莫公有文以寄不忘尚饗

祭周母文

嗚呼太孺人稱未亡人者三十年封太孺人者三年就
養京邸者二年壽凡八十五年是其閱世久而多祉也
男二人孫男女六人曾孫男女三人中為御史者一人
是其肩嗣昌而貴且賢也生而制命一章死而學士銘

詞一章棘寺行實一章公侯文武大臣奠文一章同臺
奠文一章諫垣奠文一章詞垣奠文一章哀詞凡一章
詩凡百章是其表見于世彰彰也嗚呼若太孺人可不
謂全人也哉如是而返葬于故丘道出于都門當銘旌
之一奠猥以文字為職不可以無言也尚饗

祭鄭太孺人文

維宋之子歸鄭之姬今也壽母昔也令妻為國命婦作
邦女師僮僮珠被炯炯翟衣君子偕老扶善弼違而遽

地下先驅狐狸乃驚符臺五內崩離泣血叩閭臣失母
慈維帝悼念許畢其私袒括徒跣登途南馳我二三子
昔同瑣闥或附驥尾北面彤墀義匹同氣忍能不悲不
腆寓奠靈其鑒之尚饗

祭王大理母文

於乎夫人之生也有踰耄之齒有鼎食之養有淑人之
封歿也誄以命太史祭以命宗伯葬以命司空恩數榮
名壽考令終環松四境孰與比隆亦有白首司天下平

鼎鼎齊衰銜卹南行再拜望奠維靈之歆尚饗

祭鄉貢進士儒林郎合州貳守高公文

維先生楚產也晚為翁而秦居將相材也而抑于州縣
之躊躇滇嶢巴羌杼已乘而何陋匿名飛語瘢屢洗而
不污華人息肩於重役之後驕帥即擒其私謁之奴薦
之者强弩之穿魯縞沮之者糞丸之混隋珠故於名日
就烜赫而與世竟爾崎嶇憶昔執鞭逐馬寅賓父之入
盟河腎皆寔念母之劬若夫公居絕苞苴之謁投閒無

甌石之儲有子而登於上使多祉而食乎天厨將為麟
為鳳以遨遊於世忽乘彼白雲將何之乎凡我朝紳係
情令器不勝愴咽當旐車之行群然一酹尚饗

祭匏庵先生文

嗟夫世之矜持門戶多矣任學術者非周則張或自以
為程朱語文章者非柳則蘇或自以為韓歐談詩歌者
非梅則黃或自以為李杜論史學者非壽則競或自以為
遷固其所以自待者可謂厚矣而世卒莫之許焉者皆

是也維公於是數者不自以為名而名歸之不自以為
是而人師之世卒未有異同者蓋其實不足而外自飾
者終不可以欺天下而實大者雖欲自掩而卒不可掩
若公其人乎然則位不滿其德用不究其才皆不足為
公少多而公既有以自壽者如此區區之存歿奄忽間
事耳又何足為公之修短也耶某等公門下士也撮公
之大者於酌奠之間不得不告以慰公於冥漠之表惟
公鑒之尚饗

祭吳封君文

維公自泮宮之秀至蜚澤宮之英有用世之階矣公蓋未嘗不欲仕也自夫學士之弟至為學士之父有用世之託矣公可以不必仕也自素封之君至為實封之君已食用世之報矣公蓋未嘗不仕也鄉進序於大賓之位齒又望乎大耋之尊於是而永世歟則為天之佚之厭世歟則為天之息之無不可者也亦何少多於公哉特某等尚羈縻於留務而令子昔嘗連署於留司謹因

風而寄奠公庶來格而來嘗乎尚饗

祭封太孺人黎母文

幸邇令子之溫然雖望慈閭之杳然亦得懿範之凝然
與聞內則之肅然在躬也命服之褻然在函也天章之爛
然其生也孫曾之侍班然其歿也嫺賓之哭駢然自今伊
始封溝井然松楸鬱然噫亦盛矣哉玆等不獲與於執
紼之後謹陳詞而遙奠焉尚饗

祭復庵楊先生文

於乎正學之源其堙也久矣先生方其少也力任濬之
疏之予之生也後慨不及其時見負畚荷鍤者之羣郭
之也他不足論也謀瘡患骨於懦夫縮頸吐舌之時其
流之瀑于千仞之崖也抑孰得而郭之也哉然水之性
迅極而瀦瀦有大小萬頃之陂是亦足矣可以灌溉可
以方舟氣之升也則雲雲之降也雨下土澤萬物三州
之民則亦既優既渥既霑既足矣其朝宗之勢蓋既會
百川而東焉所惜者不至海耳人亦曰有後昆在不必

於其身備焉而以壽考終命復何憾耶令子與予二三子遊又同官於斯也故率鄉之在仕者一寄奠焉尚饗

祭工部張尚書文

於乎公之歿也年已六十六矣仕四十年矣歷十一官矣外之旬宣度支之是寄內之殿最神人之是司時有升降位有崇卑不機發矢激以為疾不知雄守雌以為遲不高城深府以為異不破畛域以為隨不曠風鞭霆以從于險不循行數墨而一於夷故雖遭勒停而未

嘗戚戚及再起廢而未嘗怡怡於乎公不可復見矣而
凡在僚友於奠公也其誰不悲尚饗

祭太監傅公文

代衆作

維公粵產也天閹是翔奇質也館閣門墻委珮兮宵垂
垂以宮露橐琯今朝鼎鼎以當陽黜披之斬為涉疑似
絕整之歌以其譎張負重則屢荷鑰孔長孰不曰垂橐
而入公獨念休之用光奎可以望溘其無常爾舉桓楹
闕彼幽堂留司在位率酌一觴尚饗

祭嘉祐王文

大明正德二年七月壬寅朔二十四日乙丑謹以庶羞
之儀祭于勅封忠烈武順昭靈嘉祐王之神維神天子
奇骨已著靈標志清民暘死益咆號廟食百禩日騰英
颯我祖我宗德神之靈益崇其宇益隆其稱弗葺而圯
今幾霜星帝有明詔守土之臣爰度爰葺易陳為新告神
始王其在茲神伏惟尚饗

祭簡郎中文

維靈伏而家食時公輔之望既已起于鄉閭而達于方
嶽即欲伏而不出乎不可得也及出而在位讞鞫是司
不寃之譽鐵面之稱人人知之其於公輔之進即欲忌
而尼之者得乎夫何適轉武銓遽以殞什告是失一公
輔之器不獨鄉之人其悲凡有識者亦不能不惜也竊
因是而譬之其在家也而不能拚者玉之韞于石而精
神見于山川然也其在位也而大有聞者利器之無擇
於根盤節錯也至于良玉多毀利器必折自古恒恒有

之獨今茲哉某等敢於臨輒一奠而道其莫之為而為者以慰焉靈其不昧尚饗

祭都察院右副都御史陳矩庵文

於乎憶昔恩榮之宴吾二三子之遇兄也與兄之弟也自慶以為得郊與祁也軾與轍也握手以相歡悅也期而望之曰將來之稷與禹也既而各釐務於郎署宗伯司寇互矜其屬之有才傑也亦莫若天下士之難可恐喝也而兄既能得之於青齊弟又能得之於百粵雖然

木實繁者其枝折前四載也兄與吾曹已流涕而嗚咽矣暨兄旬宣最功中丞轉轄又皆企踵謂將萃祉于一躬而乃愛茲顛越誰無客殞中年胡慘所遺子子所最恨者群嘖啾而倚于未亡屬終事而誰經紀乎大耋嗟乎吾二三子始之期之不惟缺之而兄之所遭罹者何若是其烈也今於靈輅啓行是千載永別也羞觴在陳衆蓄之衷又安能噤不言焉以洩也尚饗

圭峯集卷二十